

## **II Uma Pido lavastaja Raivo Trass kuulutas vällä konkursi katõ pidojuhi löüdmises**

29. mail 2010 Põlvän Indsikurmun tulõva II Uma Pido tarvis otsitas kattõ pidojuhti! Pidojuhis võiva' kandidiiri 10-17 aastakka vana' nuurmehe' ja tüärlatsõ'. Vällä valitas üts tüärlats ja üts nuurmiis.

Lavastaja Raivo Trass ütles esi' niimuudu: "Ma tahassi valli' üte tüärlatsõ ja üte noorõmehe, kiä julgusõ' suurõ rahva iin üles astu ja kiä pidävä' võro kiilt umas, niisamatõ armsas umma koto, naabriid, mõtsu, nurmi ja teid, miä kokko toova' ja eräle viivä'."

Nuuri vällävalimisõs tetäs konkurss, minkast võiva' kõik tahtja' ossa võtta. Konkurss esi' om kinnine (kohal omma' õnnõ osavõtja', naidõ juhendaja' ja kutsutu' külälise') ja tuu toimus kolmapäävä, 20. jaanuaril 2010 Põlva keskraamatukogon. Kandidiirmine paarina om oodõt, a olõ-i kohustus. Valiku tege pido lavastaja Raivo Trass kuun žüriiga, kon omma' Helje Põvvat (Põlva Maavalitsüse rahvakultuuri pääspetsialist), Tarmo Tagamets (I Uma Pido lavastaja, Võro Liinatrii kunstiline juht) ja Aapo Ilves (laululuuja).

Konkursil ülesastmisõs pallõmi ette valmista' kats luulõtust valikust, miä lövväti Uma Pido kodolehelt [www.umapido.ee](http://www.umapido.ee) uudisside lingi alt. Ku suuvi om, või osaleja valli' mano viil üte luulõtusõ vai lühkü jutu, miä tälle hindäle väega miildüs. Esitämise man või vabalt pruuki api, nii tehnika ku inemiisi api (nt pillisaadõ), ku tuud tarvilidsõs peetäs.

Hindä tulõkist pallõmi teedä' anda Triinu Ojarile ([triinu.ojar@wi.werro.ee](mailto:triinu.ojar@wi.werro.ee), tel 533 22 153) vai Helje Põvvatile ([helje@polvamaa.ee](mailto:helje@polvamaa.ee), tel 525 62 18) ildampa 11. detsembris 2009. Pallõmi kirotä' meile uma nimi, vannus, kuul, klass ja muidoki hindä ja juhendaja kontakt. Kirja pandnuilõ antas edespite konkursi kõrraldusõt täpsembät teedüst.

Egä konkursist osavõtja ja timä juhendaja saa tenos I Uma Pido DVD, kutsõ II Umalõ Pido lõ ja vällävalitu' muidoki võimalusõ II Uma Pido juhina üles astu. Päält tuud pand seo konkursi tugõja, tiatri Vanemuine, avvuhinnus vällä tiatripiletiid.

Teedüs:

Triinu Ojar 533 22 153

[www.umapido.ee](http://www.umapido.ee)